

東

華

錄

東華錄

臣王先謙

周淵蕃恭校

秋七月庚午 上親詣怡賢親王殯所奠酒○諭內閣怡賢親王月祭著行至明歲八月舉殯時明歲周年及舉殯前期俱照大祭禮讀文致祭三年後每歲俱行常祭禮此係特恩後不爲例○辛未予故湖北巡撫費金吾祭葬○壬申改湖南永州府清軍同知爲理猺同知移駐江華縣添設道州江華甯遠永明之緊要各汛千總二把總八百隊十六募添分汛兵丁共三百名○四川巡撫憲德奏建昌所屬木裏喇嘛率眾歸附○甲戌諭內閣虞書曰明四目達四聰先儒注曰廣四方之視聽以決天下之壅蔽也蓋天下之患莫大於耳目錮蔽民情物理不能上聞則雖有勵精圖治

之心而措置未必合宜究難成一道同風之盛是以各省督撫大臣於本章之外有具摺之例又以督撫一人之耳目有限各省之事豈無督撫所不及知或督撫所不肯言者於是又有准提鎮藩臬具摺奏事之旨卽道員武弁等亦間有之此無非公聽並觀欲周知民間之情形耳並非以奏摺代本章凡摺中所奏之事卽屬可行之事也是以奏摺進呈時朕見其確然可行者卽批發該部施行若介在疑似之間則交與廷臣查議亦有督撫所奏而批令具本者亦有藩臬等所奏而批令轉詳督撫者亦有聽其言雖是而不能必其奉行之無弊則批令實心勉勵還朕一是字者凡爲督撫者奉到硃批之後若欲見諸施行自應另行具本或咨部定奪爲藩臬者則應詳明督撫俟督撫具題或咨部之後而後見諸施行若但以曾經摺奏遂藉口已經得旨而毅然行之則凡錢糧

之開銷官員之舉劾以及苗疆之軍務地方之工程諸如此類督撫皆得侵六部之權藩臬皆得掣督撫之肘矣行之日久滋弊必多爲害甚鉅不可不防其漸也且各省文武官員之奏摺一日之間常至二三十件或多至五六十件皆朕親自覽閱批發從無留滯無一人贊襄於左右不但宮中無檔可查亦並無專司其事之人如部中之有司員筆帖式書吏多人掌管冊籍繙閱規條稽察原委也朕不過據一時之見隨到隨批大抵其中敎諭之旨居多今於敎諭之處則未見敬謹遵奉而於未曾允行之事件則以曾奏過三字含糊藉口以圖自便有是理乎況朕曾降旨凡摺中批諭之處不准引入本章以開挾制部臣之漸則奏摺之不可據爲定案又何待言乎著將此曉諭各省奏摺諸臣知之若督撫提鎮等以此愚弄屬員擅作威福准屬員據實揭報或該部或都察院

卽行奏聞若屬員等以此挾制上司肆志妄行該督撫提鎮等卽據實參奏○諭都察院凡國家之事須實心辦理公同商酌務期妥協若以衛門人眾互相推諉因循怠忽此風斷不可長爾都察院衛門堂官及御史等所交事件理應同心辦理如堂官有不到之處爾等御史亦當共相協助何得視爲膜外今議設立巡檢一疏內稱設立巡檢原以助兵馬司耳目之所不及該鋪內一應盜逃以及黃銅賭博宰牛鬪毆打降酬酒等項應令該巡檢協力稽查不得專擅以侵司坊官之職守凡遇有地方應報之事件當令該巡檢一面申報該城御史仍一面報明該司坊官庶乎不致生事滋擾等語夫旣令其稽查又止許其報明不得專擅儻或地方有不法等事必待報明然後拘拏遇盜賊則盜賊已逃遇賭博則賭博已散遇酣酒則醉者已醒雖三尺之童亦知其斷不可行者

爾等獨不計及此乎且設一官必有一官之職若止許其報明則與番捕何異何必設此巡檢如恐其生事滋擾則當議令一面拘拏一面詳報不許擅自審理儻有不應拘拏之人牽連被累該城御史審明之日將該巡檢參處方爲妥協爾等俱係言官乃本衙門應辦之事並不實心辦理遲延數月仍復草率定議甚屬不堪著將原本擲還另行詳細妥議具奏其都察院堂官及御史等一併交部察議尋議五城關外巡檢於該管地方遇有盜逃及黃銅賭博宰牛鬪毆酗酒等事將人犯立即拘拏報明司坊官詳解該城御史發落該巡檢不得擅自審理從之○乙亥諭內閣各省文武諸臣奏摺經朕硃筆批示者俱令呈繳以備稽查但向來未定呈繳之期以致名員遲早不一有二三月後乘便呈繳者有於年底彙齊呈繳者夫既奉硃批查辦此事下次查辦奏事之時卽應

將硃批原摺呈繳以備朕之檢閱若具奏此事而仍留硃批原摺於外則朕處無檔案可稽未免難於辦理著通行曉諭凡接到硃批者仍照舊乘便呈繳若具奏此事應將原批一併呈進如所批示辦之事尙未就緒准將硃批存留俟辦理具奏之時一同呈繳

○丙子雲貴廣西總督鄂爾泰奏貴州上戛情等寨生苗內附

丁丑轉蔡世遠爲禮部左侍郎以吳士玉爲禮部右侍郎由內閣學士遷

○戊寅諭內閣國家效忠宣力之臣勳績茂著必膺崇報之典令其世享烝嘗雍正二年朕已敕建昭忠祠自開國以來致命立功盡忠報國之儔皆得春秋妥侑世世血食顧念古者大蒸之祭凡法施於民以勞定國者皆得並列祀典永受明禋則我朝名臣良弼其經邦佐治輔弼昇平者皆祭法所必登朕欲爲之建立祠宇久矣卽如怡親王之精白一心忠誠體國勳在社稷澤被生民

其功德隆盛又豈一切效忠宣力者之所可比倫乎洪惟 太祖  
太宗勑業垂統厥有一德佐命之良 世祖撫綏萬邦實多奮  
庸熙載之彥迨我 聖祖臨御六十餘年其間良臣碩輔後先相  
望據朕所深知者舉其一二如大學士圖海公賴塔大學士張英  
尚書顧八代馬爾漢趙申喬河道總督靳輔齊蘇勒總督楊宗仁  
巡撫陳璣等持躬正直奉職公忠或垂節鉞之勳或勵冰霜之節  
俯仰無愧爲朝野所共欽終始不渝無瑕疵之可指似此等靖共  
爾位不愧古大臣之風者正不乏人旣樹羽儀於一世宜隆俎豆  
於千秋且使世世爲臣者觀感奮發知所慕效羣以舉夔稷契共  
相期待則明良喜起之盛朕於斯有厚望焉著於京城內白馬關  
帝廟之旁選擇吉地特建廟宇命名賢良祠春秋以時展祀其應  
入祀之員著內閣會同該部確查本朝滿漢文武大官才德著聞

完名全節者詳慎開列具奏請旨將來繼起之臣亦併得沾被恩光永爲盛典○刑部議奏從前設立鼓廳衙門以達民間冤抑原派科道輪流巡值嗣因歸興通政司管理未派專員致有誣妄越訴之人踰墻混行擊鼓請飭通政司每月派參議一員輪班掌管遇有擊鼓之人訊明確供奏聞請旨其有因小事突入謊告者首犯杖一百徒三年餘人減一等共捏告大款欲圖洩忿及將法司已經斷明事件妄圖翻案者首犯發邊遠衛所充軍餘人減一等如有敎令主使之人各照首犯治罪從之○改山西保德州所屬興縣仍隸太原府轄○己卯江南河道總督嵇曾筠奏六月二十六七等日風雨連綿東省蒙陰沂州鄰費滕嶧各地方山水暴發直注邳州溢入黃運兩河奔騰南注已飭該道廳等加緊保護無使漫溢得旨今年春夏之交北方雨水畧少朕卽慮夏秋之間雨

水必多屢諭河臣加緊保護工程以防伏秋之汛今觀湖河漲溢情形有非人力所能捍禦者朕惟有修省戒懼以懷上天示儆之深恩更念邳州宿遷桃源等處水勢驟長禾稼室廬必遭淹没深可憫惻著差往江南清查錢糧之侍郎馬爾泰彭維新御史安修德等星赴被水地方動支藩庫銀數萬兩速行賑濟並遴選廉明人員帶往分派各處會同地方官悉心辦理勿稍稽遲勿令遺漏務使窮民人人安堵甯居各得其所其被災之處今年額徵錢糧著悉行蠲免儻有已經完納者准作明年額徵之數間發水之處民間田舍亦被損傷著巡撫岳濬遴選賢能官員前往查勘動支庫銀速行賑濟勿使一夫失所其應行蠲免錢糧之處著一併確查奏聞請旨○河東總督田文鏡參奏河南管河道拖克拖海玩忽河工於伏汛危險之時並不竭力督率搶護協理河臣范時

繹安坐旁視藐法誤工請革職嚴審得旨拖克拖海以筆帖式微  
員用爲河南南岸同知經田文鏡嵇曾筠等大計特薦來京引見  
朕看其人甚屬平常但因伊等合詞薦舉料其必有所見於是准  
其卓異旋升戶部員外郎因其熟諳河工仍以升銜管河工同知  
事務今年春夏之間朕因嵇曾筠摺奏施克拖海可勝兗甯道之  
任後見田文鏡將王鴻勳題補兗甯道降旨詢問田文鏡據田文  
鏡奏稱王鴻勳宜於兗甯道之缺拖克拖海在豫日久熟練河工  
若用爲河道實爲駕輕就熟於是與嵇曾筠會題請將伊補授河  
南管河道朕降旨允以此等微末不堪之員數年之內屢膺薦  
舉受朕深恩格外超遷至觀察大員之職拖克拖海苟有人心宜  
如何奮勉急公以圖報稱乃當河工伏汛危險之時而伊視本身  
職掌如同局外顯因田文鏡未將伊題補兗甯道蓄憾於心又見

差委朱藻到工監督中懷嫉妒以爲功過成敗與己無涉似此挾私廢公背恩藐法將上司屢次舉薦之德一槩遺忘尙得謂之有人心者乎范時繹乃一旗員朕念其爲勤臣之後加恩擢用諄諄訓誨望其克紹家聲乃在江南總督任內玩愒廢弛因循苟且無一察吏安民詰奸禁暴之善政且其居心行事詐僞不誠巧令朱鴻緒在朕前奏其操守廉潔至於日食不敷朕聞之惄然動念急令江南江西巡撫等爲伊籌畫養廉之道及查明之後始知伊於應得之項原係收受並不至於艱窘而朕猶欲俾其用度寬餘仍令加增以與之無非成就其操守使之專以殫力於封疆也乃江浙地方潛藏匪類生事不法蠭惑人心朕令李衛悉心查拏李衛果恪遵辦理又密諭范時繹若浙江行文到江南查緝人犯務必慎密拏解勿使漏網豈料范時繹袒護私交縱容匪類竟有與馬

世玷通同作弊之事各犯供據鑿鑿不能掩飾朕又密諭李衛於審訊定案之時留意保全勿使罹於重罪蓋猶諒其無交結逆黨之心不過瞻徇情面之所致且范氏一門見今爲大員者止范時繹范時捷兩人耳勳臣後裔漸致零落朕心不忍所以委曲成全之者至矣范時繹到京朕仍不肯令其罷斥廢棄特命料理太平峪吉地工程以爲效力自新之路適因北河總督不得其人於是命伊前往膺茲重任伊出京之時朕面加訓勉伊亦自陳感恩悔過願圖後效情詞懇切豈料范時繹下愚不移以本身專司之務又當伏汛危急之時田文鏡所委各員俱上緊搶護而范時繹與拖克拖海安坐於旁竟同陌路視國事如弁髦視民命如草芥此等負恩溺職之愆在他人尙且不可況在范時繹之身乎拖克拖海著革職卽於河工險要地方永遠枷號示眾范時繹亦著革職

將一切工程交伊加謹防護俟秋汎過後拏送來京將伊從前所犯罪案悉行查出從重定擬具奏儻今年防護不謹少有疏虞卽將范時繹施克拖海請旨在貽誤工程之處正法凡人貪得求進之心無有止足而又不自知其分量受恩而永遠知感者少稍不滿意而心懷怨望者多是以上司待屬員之難亦如人君之待人臣也當其未用之前則思進用旣進用矣又思邀君心之信任旣信任矣又或以不及某某爲憾卽如舉劾之間若諸臣意見僉同人君亦何樂而不從之無奈彼此所言互異不得不斟酌審量以定去取而不從其言者又以此怏怏於心似此懷庸鄙之見者正不少也屬員之於上司始初被薦之時亦知感激及遲至一二年後州縣則以不得題升府道爲憾矣府道又以不得題升兩司爲憾矣偶見同列遷官卽起姦嫉之念或見他人信用卽生退縮之

心如拖克施海今日之事小人之情狀畢露不得不嚴加懲治以挽頽風而祛惡習著通行直省共知之○裁甘肅巡撫衙門筆帖式一○庚辰以趙殿最爲內閣學士由少詹事遷○癸未復設江南蘇州府總捕同知海防同知各一松江府董漕同知水利通判各一

常州府水利通判一總捕通判各一○添設河南太康縣縣丞一祥符縣朱仙鎮巡檢一○甲申移貴州南籠府通判駐威遠汎地方隸安順府統轄○丙戌總理營田水利事務大學士朱軾等奏交河縣所屬隄工水勢漫溢請將在工人員交部議處得旨今年雨澤頗調而北河隄工水勢漫溢蓋自吾弟怡賢親王薨逝遂至籌畫多疏防護鮮術河工關繫國計民生最爲緊要朕心深廑念其作何善後之計著詢問九卿具奏莽鵠立自差委以來因病尙未任事何國宗另有辦理工程著免其議處朱軾不能彈壓屬員

使之殫力盡心著交部察議其專管分轄統轄各員著交部嚴加  
議處至漫溢一帶地方禾稼室廬必遭水患著該督遴選賢員星  
速查勘動用公帑加意賑恤勿使稍有失所其被水應免錢糧之  
處著確查奏報候旨蠲免○添設直隸易州州同一○癸巳諭內  
閣聞刑部右侍郎常賚回京路過西安府該省督撫二人及副都  
統四人率同文武等官奏請朕安乃於齊集之處副都統陸寶陳  
良棟等與巡撫爭論班次大失體統朕思同爲滿洲大臣共事一  
方自應倍加和協彼此敬禮以爲官弁兵民之表率况請安關繫  
大禮而乃於大廷廣眾之前互相爭競俾遠近傳爲笑談深可愧  
恥此番若係巡撫倡論在先朕自將巡撫議處今聞爭論之端起  
於副都統等則其過不在巡撫矣大約武臣平日以文臣缺於周  
旋或有應付不到之處懷怨於心是以假公濟私加文臣以無禮

而不顧大臣之體此風斷不可長西安副都統四人著交與總督  
查郎阿務將何人倡議何人附和之處一一查明無得稍爲徇隱  
其倡議之人交部嚴加議處附和之人交部議處若查郎阿不能  
據實查明朕卽將副都統四人俱調來京另派大臣審訊嗣後西  
安一應會集之處巡撫班次著在副都統之上永遠遵行該省巡  
撫副都統等若因此番爭論之故文臣或有齎制武臣之意武臣  
或有怨忿文臣之心別尋事端暗生嫌隙經朕訪聞必究問根由  
將理屈之人從重治罪大凡文武不和皆起於私心蔽錮若公則  
未有不和者朕之訓誠至詳且悉同爲國家之臣同辦國家之事  
不能違朕訓旨共矢和衷止因一念之私遂至懷挾猜疑各立門  
戶置國家公事於不問有是理乎嗣後各省儻再有文武不和者  
朕定將文武官一併調取來京嚴加究治以爲人臣因私廢公者

之戒○丙申改雲南永昌道爲分巡迤西道添設分巡迤東道一  
八月己亥諭戶部前聞直隸地方有被水之州縣朕心軫念已星  
遺侍郎牧可登副都統阿魯等分路前往蠲賑兼施茲據署督唐  
執玉奏稱各屬被水情形消長不一有上諭所及之處而水勢消  
落可免成災者亦有上諭未及之處而田廬被災急須拯恤者著  
行文交與牧可登阿魯等照該督所請悉心查勘覈實通融其前  
諭未及之處有應行賑濟者卽交附近差往之大臣官員等速行  
料理務令得所以慰朕拯恤災黎之至意○諭據河東總督田文  
鏡奏報山東被水之州縣朕已降旨諭令動支銀穀加意賑恤茲  
聞萊州府屬之昌邑壽光濰縣青州府屬之益都沂水博興高苑  
臨朐濟南府屬之鄒平等縣俱被水患民舍田禾不無傷損著該  
督撫委員查勘應否與從前所報州縣一體加恩之處一面辦理

一面奏聞儻再有續報被水者亦著遵照前旨速行料理毋使稽遲○壬寅吏部議准江蘇巡撫尹繼善奏江蘇要地駐員防範事宜一蘇州崇明一邑屹峙重洋爲江南屏障所有武職設總鎮四營而文職止一縣令應添設巡道一員統轄太倉通州二屬駐紮崇邑至崇鎮四營向俱駐紮縣城而該縣所屬沙地極爲遼遠未免巡查不及應撥左營一營分駐永興沙其半洋沙應添設巡檢一大安沙應以原駐縣城之巡檢移駐並撥左營千把二分防至戲臺等沙十處應各設哨船一隻派兵巡緝一江蘇按察使見駐江甯與下江巡撫衙門相距太遠應改駐蘇州其蘇松道有巡緝之責不宜駐紮蘇城應改駐松江上海縣統攝通洋口岸至福山營係江防門戶應於蘇鎮四營內每營撥沙船二隻歸屬該營與京口狼山等汎按期會哨從之○予故原任禮部尙書李周望祭

葬○乙巳戶部遵旨議奏京畿各府有莊屯之地方旗人事務繁多應以三百里內外爲一路分爲八路設官八員分司辦理得旨依議旗莊等處設立官員乃立法之始必得賢能之人實心辦理訓導有方始有益於人心風俗茲所差往之員著該管大臣於所屬內揀選保舉差往之後仍著留心察訪或有不能稱職或在地方生事保舉大臣據實參奏者免其誤保之處分若不行參奏經朕訪聞發覺者將保舉大臣一併議處○己酉甘肅巡撫許容奏本年六月十五日遵旨於河州口外營建河神廟宇卽有祥雲捧日五色成文至七月初五日自積石關至撒喇城查漢達斯等處百餘里忽見黃河激清徹底凡歷三晝夜官民喜躍稱慶以爲從來未有之上瑞得旨朕從來不言祥瑞年來各省奏報慶雲醴泉鳳凰芝草之屬悉皆屏卻惟務君臣士庶修德行義以承天眷屢

頒諭旨詳矣今年春降旨於河州口外地方恭建廟宇以答河神  
福國佑民之賜而彼地河流卽昭上瑞顯著休徵益見天人感應  
之理捷如影響若求之不以其道或以己事或出私心則不但不  
能感通且上干明神之怒惟以公心爲昭事之本必蒙上天垂鑒  
而默佑之其益加勉勵夙夜敬謹以受天恩○辛亥諭內閣吾弟  
怡賢親王之事朕躬至誠至敬翊贊効襄裨益於宗社國家民  
生吏治者功勳懋著自古罕有比倫而其忠愛之心肫誠篤摯出  
於至性更有非言詞稱述所能宣者朕卽加恩沛澤於常格之外  
究不能展朕崇德酬庸寤寐懷思之念也吾弟之子弘曉著襲封  
怡親王世世相承永遠弗替凡朕加與吾弟之恩典後代子孫不  
可任意稍減佐領屬下等項亦不可那移更改再者朕於雍正三  
年春曾降諭旨於王諸子之中再封一郡王以昭恩獎彼時王再

四懇辭情詞諄切朕不得已勉從所請今吾弟薨逝朕追念遺徵  
中心展轉在賢王應有加隆之禮在朕衷實有難已之情雖與吾  
弟素願相違朕亦不遑顧恤弘皎著封爲郡王世襲罔替○癸丑  
諭戶部據湖廣總督邁柱奏稱沔陽州錢糧自康熙五十五年至  
雍正四年積欠銀八萬九千二百餘兩里民一聞清查爭先完納  
今已完銀二萬三千四十餘兩其官侵役蝕包攬之項仰請暫緩  
究治一年追完如逾限不完照例治罪其餘實在民欠並懇與以  
一年之限分作三限徵收則民力寬舒等語朕之降旨清查積欠  
者原以地方貪官污吏及不法衿棍借民欠之名恣意侵蝕蠹國  
累民爲害甚鉅不得不清釐懲治以儆將來今於沔陽州逋賦之  
內果查出侵蝕包攬銀三萬餘兩而里民一聞清查卽爭先完納  
可見民心本屬善良而從前之間有拖欠者則官吏衿棍導之爲

非又或因該州近水常有澇溢之事力量未免不敷並非有心頑抗輕視國課也其見在未完之民欠三萬餘兩朕意欲開恩酌量蠲免俟督撫造具清冊到日再降諭旨目今著停止催徵並將此旨出示曉諭百姓知之其侵蝕包攬之項著照邁柱所請寬限一年令其完納如逾限不完照例治罪○諭兵部從前朕以武弁一年所得俸薪不敷所用令自提鎮以至千把總酌量給與親丁名糧以資養贍今各省添設外委千把尙未議及念此外委人員所辦者千把總之事而所食者仍止本身一分馬糧一應公差紙筆衣馬之費實有不敷著將各省添設外委千把總每名給與步糧一分卽令伊之子弟家人頂食以資養贍儻有巧借辦公名色剋扣兵餉滋擾地方者著該管官卽行揭報該轄大員指參毋得姑徇寬縱○乙卯巳刻京師地震○丙辰以地震賜八旗兵丁帑銀

每旗各三萬兩圓明園兵丁每旗各一千兩以爲修葺屋宇之用  
○戊午發帑銀二萬兩遣員往勘近京地震情形加恩賑給○署  
直隸總督唐執玉等奏請於直隸省建怡賢親王祠一所任縣之  
穆家口建祠一所天津建祠二所從之○己未諭宗人府康親王  
崇安心術狡詐行止輕浮豈堪爲宗室之坊表不准管理宗人府  
事其宗令事務著裕親王廣祿管理○移河南信陽州州判駐平  
昌關改信陽汎爲信陽營添設守備一兵五十五名屬汝甯參將  
轄○庚申諭宗人府吾弟怡賢親王第三子弘暉於今年病故彼  
時降旨一切禮儀俱照貝勒之例嗣又降旨於怡賢親王諸孫之  
中以一人爲弘暉之嗣令福晉富察氏撫養今著將甯郡王弘皎  
之長子永喜爲弘暉嗣襲封貝勒○壬戌蔡世遠緣事降調轉吳  
士玉爲禮部左侍郎以王圖炳爲禮部右侍郎由左副都御史遷○以沈

廷正爲河東河道總督張允隨爲雲南巡撫由貴州布

政使遷

九月丁卯朔諭內閣昨因京師地震凡兵民等屋宇傾圮者已降旨詳查賞給銀兩以爲修理之費而滿漢大小官員等亦俱有修垣葺屋之事朕心軫念著將各部院衙門官員八旗都統副都統領驍騎校護軍校等以及上衙門之世襲官上三旗侍衛內務府官員步軍統領衙門等官巡捕三營官弁每人俱賞給半年之俸○諭八旗都統八旗兵丁等房屋傾圮者昨已每旗賞銀三萬兩爲修理之用聞該管之都統官員等不論坍塌垣牆之多寡及有無傷損人口之處一槩均勻給散並無差等其名則均而實則不均之甚總因伊等潦草塞責不肯以實心經理公事俾朕之恩澤不溢不偏登眾兵於柂席也除從前所賞銀兩各旗已經均給外朕再賞每旗帑銀三萬兩著該旗大臣等悉心確查分別等次

秉公賞給務令寒苦之家實霑恩惠儻仍任意給發不能公當者  
經朕訪聞必於該旗之大臣官員是問至於八旗官弁已給半年  
之俸不在查賞之內○戊辰諭內閣自古爲治之道在於和衷孟  
子曰天時不如地利地利不如人和蓋天下之事未有不和而能  
有成者果能和矣則天地神明尚覺呼吸可通而況於人乎然能  
和之道惟在於公公則必不至於不和不公則斷不能和此又一  
定不易之理朕所日日訓誨天下臣民而望其洗心滌慮信受奉  
行以共享昇平之福也文武雖屬兩途然同在一省一方之中同  
辦國家之事則不但有同舟之誼實如手足臂指之同在一身也  
人身一體不適則百骸皆爲之不甯此亦顯而易見者奈何爲私  
欲蔽錮而任肢體之互相戕賊以貽腹心之患乎數年以來朕留  
心體察內外同事臣工頗能遵朕諭旨勉矢和衷之義卽文武各

官同在一方而各殫其職無爭競嫉忌之念者亦多有之此皆人心風俗之善亦該省文武大臣實心表率化導之功也惟有廣東一省惡習相沿頹風難挽文與武既分爲兩黨而文與武與武又各分爲一黨如楊文乾石禮哈常賚阿克敦官達之互相排陷讎怨相尋則皆方願瑛一人從中播弄之所致至於文武彼此告訐之言不可殫述文官則言武職諸員或向知府包攬漏稅或向州縣屬託人情稍不如意卽出謗言以勤謹辦事者爲過於躁急以不徇私情者爲擅作威福又如兵米一項地方有司給與本色而營弁以不能折價爲憾往往蓄怨於心此文員陳訴之大槩也武官則言文職諸員貪鄙居心黨援不解恃有承審之柄藐視武途大小有司夤緣交結武弁若拂其意卽啓釁端以爲報復之計常有武職查拏違禁之事如賭博私宰等類而文員則置若罔聞

或徇情釋放又如礦山聚眾至數千人係府縣官員之家人勾引姦徒開採希圖重利武弁遣兵驅逐以致結怨益深此武弁陳訴之大槩也年來似此等語達於朕聽者不止數處亦不止數人雖出於怨懟之口不足盡信然亦未必皆全無影響之談爾文武各員自思之膺國家簡命之榮受管轄兵民之寄乃以營私網利之故相傾相軋效市井無賴小人之所爲而置人心風俗官方戎政於不問爾等不自知愧朕實爲爾等愧之況督撫藩臬而有袒護文官之心則武弁必有被其屈者矣提督總兵而有袒護武弁之心則文員必有受其枉者矣文員而有袒護百姓之心則必有無辜受害之兵丁矣武弁而有袒護兵丁之心則必有無辜受害之百姓矣不和之故由於不公不公之害至使官兵並受其困爲臣工者尙可狃於故習而不猛省速改乎巡撫統率全省文員

提督統率通省武弁至於總督則兼文武而統轄之者果能秉公持正無黨無偏以己身爲庶官之坊表而又時宣揚朕諭俾其儆戒提撕若遇屬員有爭競告訐之事則以理判其曲直不存文武偏向之見過小者切加戒飭過大者卽入彈章俾強弱不得相陵是非無或倒置如此而屬員有不革面革心嚮風率教者無是理也朕今再頒諭旨通行曉諭著該督撫等遵照刊刻通省文武大小官弁各給一道俾令朝夕觀覽改前愆而敦善行儻再有蹈襲故轍罔知悛悔者則是冥頑不靈自違越於訓敎之外矣國法具在本人自無所逃而文武大臣表率無方訓導不力有忝封疆之任負朕倚任之恩亦定嚴加處分不稍寬貸觀風整俗使亦當留心稽察可也○庚午禮部遵旨議奏褒功列爵古有成規而肇錫嘉名尤屬旌庸盛典我朝佐命元勳承平豆弼錫之公爵旣已分

爲一二三等以示寵榮 皇上篤念舊助更隆追獎誠宜考其平生之實蹟加以庸顯之令名謹按佐命之臣開疆拓土者宜倣漢之信武奉義建策唐之翼國開國宋之福國元之忠武壽國明之雄武靖甯等名其宣勞盡力於承平之日者宜倣漢之冠軍壯武富民褒德唐之安國宋之崇國成國元之甯國定國明之崇信忠勤等名或就其所樹之勳予以安東征西定朔平南等名或就其立功之地予以秦晉齊豫吳越楚蜀粵閩滇黔等名上加征靖蕩平綏定安輯等字將原封一二三等之號仍冠美名之上至宗室等公則加封奉恩字樣外戚等公加封承恩字樣庶禮以義起名與寶符宣之制敕照舊例而彌光襲之子孫跋前徵而踵美矣臣部將一二三等公並宗室外戚公誥命事實造具清冊移送內閣撰擬美名恭候 欽定從之○辛未封故藩親王允祐子弘暉爲

多羅滄郡王○壬申理藩院奏喀爾喀扎薩克郡王汪扎爾所辦軍前應用駝隻誤限不到怠玩軍務有負國恩應革去王爵應襲之人奏請承襲從之○丙子實授黃文輝廣東按察使○丁丑諭大學士等從前直省應行起運錢糧該省撫藩以解部爲艱每至撥餉之時百計營求借備公協餉之名存留本省而戶曹堂司亦就中漁利將雜項稅課盡留該省司庫卽正項解部者亦屬寥寥以致外省撫藩得藉存庫名色通同那用而州縣效尤亦不肯隨徵隨解官侵吏蝕虧空累積怡賢親王總理戶部以來與二三大臣同心釐正直省一切正雜錢糧除實在存留並各封貯數十萬兩以備公用外其餘悉於春秋二季按數撥解從此各省不敢有虛收虛報之弊是以虧項漸清帑藏充裕今怡賢親王薨逝戶部大臣仍遵守遺規未嘗稍易但恐不肖司官及姦猾胥吏乘間覬覦

覲希圖撞騙而無知外吏或冀倅可以復行舊習稍留掩藏虧空  
餘地仍令書吏家人到京鑽營亦未可定儻有此等或經戶部大  
臣察出參奏或朕親有訪聞定將該巡撫藩司革職究擬司官書  
吏卽行正法決不姑貸○加河南河北道朱藻僉都御史銜協辦  
總河事○戊寅移陝西臨潼縣丞駐關山鎮○己卯工部議奏湖  
廣總督邁柱奏湖南永順等處新設一府四縣原議府治在榔溪  
地方今查局勢狹隘未便建設請將永順府移駐猛洞以永順一  
協兵弁隨城駐紮其桑植同知應改爲永順通判仍駐桑植司治  
永順同知移駐且武營龍山縣移駐麂皮壩並移田家峒巡檢駐  
榔溪施溶州巡檢駐王村張家壩巡檢駐里耶均應如所請從之  
○庚辰移貴州遵義府糧捕通判駐仁懷縣舊城其仁懷縣署改  
駐生界撥把總一兵五十名駐防○壬午閼里孔廟成○甲申

諭內閣朕臨御萬方宵旰勤求惟以愛養斯民爲念數年以來除租減稅屢沛恩膏不但旱澇歉收之處蠲賑兼施卽該省年穀順成不須寬賦而朕欲使民力饒裕每加格外之恩蓋國家經費旣敷則藏富於民俾各家給而人足乃朕之至願也查各省錢糧朕特降諭旨蠲免者已多此次第舉行應及於江西湖北湖南三省著將辛亥年三省額徵錢糧各蠲免四十萬兩又念直隸乃畿輔首善之地應沛殊恩山東今歲被水之州縣稍多朕心甚爲軫念除二省澇溢地方已加意賑卹並將本年額賦照例蠲免外著將辛亥年二省錢糧各蠲免四十萬兩以上五省各該督撫應仰體朕心嚴飭有司敬謹奉行務令閭閻均霑實惠○乙酉諭內閣朕覽高其倬等所奏太平峪吉地事宜甚屬妥協大凡讀書居官之人通曉堪輿者甚少卽或知之又往往以此爲譁不肯身任其事

高其倬乃封疆大臣爲國家樹績建勳爲己身揚名垂譽原不必以此爲宣力見長之地乃其心以爲國家之事莫大於此以一身協贊怡賢親王肩此重任籌度萬全無一毫瞻顧推諉之意此實出於一片忠愛至誠之悃不僅材識超羣已也高其倬著賞給一等阿達哈哈番管志甯明圖任擇善海望保德等地理明通贊襄勤慎一併議敘○己丑以沈廷正爲左副都御史由山東河南河道總督遷○庚寅諭內閣今年八月十九日地動朕恐懼修省以懷天戒並將夏秋以來朕躬靜攝不能勤敬如前以致上千天和引過自責曉諭天下今經一月矣地氣尙未全甯又值兩次陰雨朕轉念露處之民恫瘝乃身未嘗不願與之共此苦也惟是天地之災祥皆由於人心之感召朱子曰吾之心正而天地之心亦正吾之氣順而萬物之氣亦順然天地之心安有不正者其或有不正乃從人心

之所感天地豈有降災於人之理也尙書曰作善降之百祥作不善降之百殃善惡之報如影隨形是人人有感格天地錫福降殃之理遇災而懼上下貴賤當同此心乃顯而易見之理也當地動之日朕偶先登舟是以並未受驚卽旣動之後城內宮中及圓明園宮眷子孫長幼內外侍從數百人悉皆安吉豈非上天示儆之時仍賜護佑耶今者地動之象久而未定雖當日曾經 皇考訓諭曰大動之後必有微動康熙十八年地動至一月有餘又會見書籍記載明成化時地動至二十三日是地動經月之久亦向來之所有者然虔修人事以轉移天心必須君臣上下各殫其誠悃朕身居帳幕之中寤寐悚惕寢食靡甯者已一月有餘矣願爾大臣官員士庶兵丁等人人誠心感激上天示儆之深恩返衷自問思過省愆不但惡事邪念急宜埽除卽怨尤抑鬱之心亦當屏絕

則天高聽卑必垂照察不但地土甯靜共獲安居且可永免上帝之譴責斷無再罹險阨之虞朕非以地動之異諉過於臣工黎庶也朕之平生先責己而後責人先自勉而後共勉願天下臣民共知朕心○諭吏部向來各處鹽政弊端甚多累民蝕課難以清釐多由鹽場大使不得其人之所以定議於候補候選知縣等員內揀選命往令司大使之事彼時該部因人員不敷遂將監生捐納職銜之人亦入於揀選之內今行之二年眾人潛啓鑽營之念聞有央求同鄉京官出結而私相餽送者此風斷不可長嗣後鹽場大使之缺止准於候補候選人員內揀選引見不必用捐納職銜之人儻或人員不敷著將在部學習之人及留京之拔貢生令各部堂官及國子監祭酒等擇其爲人謹慎有身家可以辦事者保送吏部以備揀選○辛卯諭內閣從前因吾弟怡賢親王氣

體清弱時常抱恙朕諭令訪聞精於醫理之人及通曉性宗道教者以爲調攝頤養之助上年吾弟奏稱京師白雲觀近有一人通曉心性之學朕令召來一見王以未曾深知不敢令其入見朕云其人之學術精粗深淺朕面詢卽知第召來一見無妨也逾數日遵旨進見朕所詢問伊不能對及諭以心性之學伊則僞作欽服之狀極口稱頌朕察其虛詐中無所有畧加賞賜而遣之後朕降旨與外省一二督撫令其便中訪問通醫學道之人隨經李衛奏稱聞中州有賈士芳者平素通知數學臣未曾識面亦不能確知其人朕隨降旨與田文鏡將伊送來初到時朕令內侍試以上筮之事伊言語支離啓人疑惑因自言上年曾蒙召見朕始知卽白雲觀居住之人也伊乃自言長於療病之法朕因令其調治朕躬伊口誦經呢並用以手按摩之術見伊心志姦回語言妄誕竟有

天地聽我主持鬼神聽我驅使等語朕降旨切責伊初聞之亦覺惶懼繼而故智復萌狂肆百出公然以妖妄之技欲施於朕前伊欺世惑眾素行不端曾經巡撫楊宗義訪問查拏伊始稍稍斂蹟厥後仍復招搖今則敢肆其無若無父之心國法具在難以姑容且盡毒斃律有明條著拏交三法司會同大學士定擬具奏○雲貴廣西總督鄂爾泰奏建水州邊外猛弄塞長白氏內附○壬辰諭內閣直隸水利營田吾弟怡賢親王殫數年之心力區畫經營爲小民興萬世之利甫定規模而賢王薨逝遂至防護多疏隄岸漫溢朕心憂慮深恐將來日漸廢弛前功墮棄特命九卿等籌畫善後之策今覽九卿所議多屬浮辭至云凡怡賢親王所欲行而未竟者皆分別緩急次第興工此語更屬支離夫已行而未竟者則王之事也若云欲行而未竟者此乃游移影響之談巧卸其

責於王矣王既會未見諸施行則以後辦理之事皆諸臣之事若辦理妥協王不居功若辦理不妥而以欲行二字歸過於王朕豈忍聞此語乎當怡賢親王經理之時朱軾多病就衰艱於跋涉此眾人所共知者至於莽鵠立性情偏僻何國宗器量卑庸祇因今歲工程緊要姑且用之非謂可以長膺此任也且朱軾等居住京師安能遙辦河工之事自應特設管理大臣以專職任將其中事務可以分派地方官者則分派辦理以收羣策之效九卿所議俱未及此著另行詳議具奏○雲貴廣西總督鄂爾泰奏永昌府邊外孟連土司每年願納廠課鶴慶府邊外怒子每年願貢土產得旨孟連地方及怒子野夷地處極邊自古未通中國總督鄂爾泰化導有方俾各輸誠效順任土作貢虔心向化甚屬可嘉其孟連土司廠課每年六百兩爲數太多著減半收納以昭柔懷至意怒

子每年貢納土產時著給鹽三百斤以爲犒賞○乙未諭八旗蒙古都統察哈爾地方原係蒙古遊牧處所若招民開種則遊牧地方必至狹隘且民人蒙古雜居一處亦屬無益著行文察哈爾總管等查有此等擅行招民開種之處據實呈報將前罪悉行寬免儻仍復隱匿一經發覺加倍治罪○復設廣東潮陽縣縣丞一  
冬十月丁酉王大臣等議奏左道賈士芳性生悖逆術習妖邪假託知醫之名顯露不軌之迹請照大逆律凌遲處死其親屬男十六以上皆斬十五以下並母女妻妾等給付功臣之家爲奴得旨賈士芳著改爲立斬其應斬人犯著監候其應爲奴之妻女等暫著地方官嚴行看守○己亥刑部等衙門議奏原任庶吉士徐駿狂誕居心背戾成性於詩文稿內造爲譏訕悖亂之言應照大不敬律擬斬立決將文稿盡行燒毀從之○庚子諭禮部大小官帽

頂從前定議未曾分別詳確著該部再行妥議定制具奏尋議自親王至公侯伯及一品大臣以上俱照見今所用帽頂毋庸更議外其二品以下朝帽頂與平時帽頂俱按品分晰酌議輔國將軍及二品官俱用起花珊瑚朝帽嵌小紅寶石奉國將軍及三品官俱用藍寶石或藍色明玻璃朝帽嵌小紅寶石奉恩將軍及四品官俱用青金石或藍色涅玻璃朝帽嵌小藍寶石五品官用水晶或白色明玻璃朝帽嵌小藍寶石六品官用硃磲或白色涅玻璃朝帽嵌小藍寶石七品官用素金頂朝帽嵌水晶石八品官用起花金頂九品官及未入流俱用起花銀頂進士舉人貢生仍用金頂生員監生仍用銀頂得旨依議總督未加尙書銜者著爲正二品侍郎及外省巡撫俱著爲從二品○辛丑諭內閣據甯遠大將軍岳鍾琪奏吐魯番回目額敏和卓屯田種地恭順效力甚屬可

嘉朕聞之深爲喜悅額敏和卓賞段二十四其種地效力之回民  
賞銀二千兩著提督紀成斌差遣員弁前往吐魯番會同額敏和  
卓秉公賞給以示朕加恩外藩之至意○大學士等遵旨議覆烏  
蒙叛夷構逆總督鄂爾泰已調撥川黔官兵剋期進剿恐賊夷遠  
遁渡江入川請於沿江緊要之處分防堵禦但川省各路汛地營  
兵或有不敷應行令提督黃廷桂召募充補得旨川省派撥漢土  
兵丁著每名賞銀五兩此所派官弁兵丁俱聽鄂爾泰節制調遣  
滇黔二省已派兵九千名各處汛守或有應行添補之處著鄂爾  
泰斟酌便宜召募○壬寅大學士等遵旨議准署福建總督阿爾  
賽奏臺灣道府廳縣等官舊例到任一年之後督撫揀選內地之  
員赴臺協辦俟半年後將舊員調回補用統計前後不過年半而  
獨當其任者不過半年爲期太近該員未必不以任事不久草率

審責諸務諉延請嗣後調臺各員俟到任二年該督撫選員赴臺  
協辦仍照例於半年後調回舊員則在臺各員既得盡心辦事又  
可免交盤頻疊及草率諉延之弊從之○癸卯諭大學士等尙書  
查弼納著馳驛來京西安軍需署督查郎阿前往肅州辦理仍  
兼理川陝總督印務秦布著回西安將軍之任護軍統領宗室哈  
爾吉著前往涼州代秦布統領兵丁○添設江南揚州府水利同  
知一駐紮泰州東臺場○甲辰諭內閣各省人命抵罪之案其應  
輕應重朕確有所見者卽降旨定奪若其情罪在疑似之間而擬  
罪在可輕可重之際朕心不能卽定者方交與九卿定議以期平  
允乃往往見九卿定議之案槩以減等發落覆奏如此則朕何不  
卽令減等而必多此曲折乎凡此交與九卿定議之案其中有應  
行減等者或有可以枷責完結者亦有不可寬貸仍應按律抵罪

者向後務期權衡允當寬嚴適中以副朕明罰敕法之至意○諭  
我朝定鼎之時漢軍從龍入關技勇皆爲可用今海內承平日久  
伊等耽於安逸且意在文職而不在武弁是以韜畧騎射遠不如  
前目今官至提鎮副參者寥寥無幾而在內簡用都統副都統時  
亦覺難得其人朕爲此時廑於懷常思漢軍生齒日繁當籌所以  
教養之道而額設之兵丁爲數又少似應酌量增添於國家之營  
伍旗人之生計均有裨益如外省之駐防漢軍子弟日漸繁衍而  
本身錢糧各有定數難以贍養應令餘丁回京披甲亦可望其成  
人又如外官隨任之子弟往往遊蕩荒廢前曾有旨悉令回京披  
甲當差習學弓馬以圖上進又如候缺之微員一時難以銓選者  
若情願披甲當差到應選時仍許輪班補用則在彼既可得受錢  
糧以爲餬口之資又可豫先習學弓馬以備居官之用又如內務

府人丁甚眾於充役當差之外其閒散人丁亦可撥入八旗披甲再五旗諸王之漢軍佐領仍屬本王外其貝勒貝子公等之漢軍佐領實無所用應撤歸旗下公中佐領當差且可免掣肘之弊其如何增添漢軍兵額及如何妥協充補永遠可行之處著尹泰查弼納石文焜石禮哈莽鵠立德祿等議奏尋議漢軍八旗總計領催槍手礮手放爾布教養兵並銅匠鐵匠弓匠聽差護城看門及看守礮位火藥局教場等兵以至步兵門軍共一萬七千五百二十八名今請於原額之外酌量增添兵二千四百七十二名以足二萬之數但查上三旗一百二十七箇佐領又半箇佐領下五旗二百三十八箇佐領應將上三旗佐領每旗均爲四十分下五旗佐領每旗添足三十分其上三旗所餘之七箇佐領酌量撥入下五旗從前半箇佐領下所轄人少俱以公中壯丁補足之計添設

佐領三箇共二百七十分皆各勻整所有新添佐領下應增領催十五名步兵領催三名步兵四十八名每佐領下各補足槍手四十名敖爾布八名共應添補槍手五百四十六名敖爾布一千三百六十名上三旗每旗補足教養兵一百八十八名下五旗每旗補足教養兵一百四十九名共應增添教養兵五百名如此則八旗漢軍佐領由此均齊而兵丁足用至挑補新添兵丁見據八旗冊開在京閒散壯丁約萬餘人此外各省駐防漢軍之餘丁情願歸旗者行令各該將軍咨送歸旗挑選充補再外官隨任子弟年至十八歲以上者悉令歸旗除情願讀滿漢書者移送官學國子監肄業並學習弓馬外其情願披甲食錢糧者仍准挑補甲缺再候選徵員情願披甲者亦准其披甲如遇選期輪班補用至內務府見今查出過繼養子等項人丁約二千餘名亦應撥入各旗漢

軍壯丁不齊之佐領下一體挑選披甲當差至於下五旗漢軍佐領除親王郡王屬下外其貝勒貝子公等既有包衣佐領則所屬漢軍人等應歸入各旗公中佐領庶漢軍不苦生計之無資而國家亦收營伍之實效矣從之○丁未實授謝旻江西巡撫○增廣東吳川縣砲州巡檢一○己酉諭內閣辦理軍需必得熟練之員方爲有益陝甘二省州縣官員備辦軍需有經手數年者有經手一二年者似此熟練人員若因細過微瑕卽行參革則接任之員初辦軍務未免生疏或致遲誤嗣後陝甘地方辦理軍需之州縣官員若無大過其所犯情有可原者著該督撫揆情度理量加寬宥若錢糧微有不清而事屬因公者統俟大軍凱旋之後查覈明白以定功過○雲貴廣西總督鄂爾泰奏烏蒙蠻猸自改流設鎮臣不時諱屬隄防乃總兵劉起元乘臣往來黔粵私派公費侵欺

糧餉客民被劫混將頭人拷比臣訪聞得實隨密差中軍副將魏  
翥國前往按款確訊一面摘印以憑參奏不意於八月二十六日  
至二十九日夷眾叛逆圍城劫殺總兵官劉起元等雖劉起元撫  
綏失宜激變有由臣膺封疆重寄愧覺察之已遲恨參革之不早  
請賜罷斥速簡賢員料理總督事務並暫假臣以事權督師進剿  
雖馬革裹屍亦所至願得旨烏蒙逆苗悖叛已令遣發官兵分路  
進剿總兵劉起元既苛刻於平時又不能防禦於臨事粗疏暴戾  
自速其辜惟是遊擊江仁知縣賽枝大等倉卒遇害累及妻孥深  
可憫惻著總督鄂爾泰查明具奏加恩賞卹至於烏蒙蠻眾其性  
反覆靡常朕常慮其不能帖然甯謐今年春夏以來朕躬違和精  
神不能貫注及此鄂爾泰於夏秋之間亦抱恙而烏蒙遠隔千餘  
里豈計慮之所能周不但朕所深知亦中外所共諒也況鎮臣劉

起元撫馭失宜防範鮮術事由激變責有攸歸該督引咎自効並請解任督師之奏大非朕心其節制滇黔川省各路兵丁之處仍遵前旨行○改陝西潼關縣大慶關巡檢歸朝邑縣轄○四川巡撫憲德奏會鹽營所屬木里喇嘛六藏塗都內附○辛亥諭大學士等兵部尙書查弼納著爲副將軍命往北路與靖邊大將軍傅爾丹副將軍巴賽辦理軍務副都統德祿著往北路軍前與隨印之內閣學士永國辦事副都統銜馬爾薩著授爲內大臣與陳秦蘇圖海蘭參贊軍務戴豪袞泰石禮哈不必參贊軍務舒楞額不必來京著前往振武將軍處代馬爾薩辦事黑色圖克善俟大將軍到營著令來京石禮哈不諳滿洲軍營事務著管理綠旗兵丁但不可膺統轄之任著大將軍等酌量派委○諭兵部年來出征兵丁在外支給口糧而仍給與坐糧以養贍其家口蓋因其荷戈

持戟效力戎行不忍令有內顧之慮也各省土兵有派撥征勦者則於起程時賞給銀兩而無養贍家口之例朕思本身遠出在外則於營生之計不能兼顧其父母妻子或致俯仰無資深可軫念嗣後土兵之出征者除恩加賞賚外其父母妻子在家照守兵坐糧之例每月給銀九錢米三斗米折銀賞給著督撫提鎮差委官弁前往該地方會同土官秉公散給務令均霑實惠儻有侵蝕剋扣等弊一經發覺定行從重治罪決不寬貸目今雲貴川廣等省效力之土兵卽照此例行並將此旨通行曉諭各省土兵知之○壬子諭內閣向因大興宛平二縣近在釐轂之下常有速辦之公事不得不那移庫銀以濟用而上司察知每以虧空題參至於罷斥治罪實爲可憫用沛特恩於大宛二縣各發庫銀一萬兩存貯該縣儻遇有速辦之公事准其詳明府尹動支應用此朕體恤有

司之至意也近思辦理軍需之州縣其急切應付之處不容刻緩而該州縣並無存貯備用之項若擅動公帑又于嚴謹有司實處兩難不可不爲籌及朕意欲於辦理軍需及事務繁劇之州縣亦倣大宛之例酌留帑銀以備急切公事之用其如何舉行俾辦公有賴而弊竇不生著大學士會同大將軍岳鍾琪總督高其倬悉心定議具奏尋議嗣後辦理軍需省分請計其事務繁簡留銀三十萬兩或二十萬兩其公務簡少而錢糧又屬富饒之省分應酌留十五萬兩或十萬交督撫藩司酌發各府及直隸州存庫所屬州縣遇有緊急軍需卽時請給其相距寫遠而事屬不容刻緩者准其一面具文一面先動本州縣庫銀支用俟給發後還項仍令逐案報銷督撫藩司嚴行稽覈從之○諭戶部陝西四川地方民風醇樸歷年逋賦甚少查每年徵收錢糧之期四月完半十月全

完此定例也朕思四月十月既届納課之期小民必須豫先經營  
是麥穀未收之時卽爲輸將之計或因稱貸而受剝於富豪或因  
平糶而大虧其價值且如甘肅地方有徵收本色者若在糧穀未  
穫之前更爲竭蹙歷來川陝錢糧旣無拖欠之陋習著將四月完  
半者寬至六月十月全完者寬至十一月俟夏麥秋禾築場納稼  
之後從容完課俾民力紓徐以副朕愛養黎元之至意○雲貴廣  
西總督鄂爾泰奏官兵報捷恢復烏蒙情形查東川一路烏蒙性  
最冥頑煽惑諸苗江外則句連涼山下方阿驥各賊以爲依仗江  
內則糾合巧家營者家海以爲黨援始於祿鼎坤成於祿鼎新祿  
萬福而東川之凡爲祿氏兇目起而應之近江則補以址地方要  
截江路近城以則以擢地方窺伺城垣東川境內空泥矣氏歹補  
阿汪等寨東川境外急羅籌施魯古牛畢古等寨迤邐至於武定

尋甸所屬隘口沿途堵塞拆毀橋梁以致行路斷絕威甯一路阿  
底爲咽喉鎮雄一路奎鄉爲鎖鑰悉勾通頭目互謀叛逆殺傷塘  
兵搶劫糧運且串結漢奸代傳木刻奸細四布惶惑民心臣一面  
飛調官兵土丁分爲三路分防會剿一面出示曉諭令各地方官  
團練鄉兵以資守望復嚴緝漢奸密拏奸細訊確逆情隨旨呈示  
凡出師弁兵各賞銀兩氈衫棉襖運糧夫役照價增加給與通計  
兩省所調官兵共一萬數千人土兵半之東川一路令臨元總兵  
魏翥國總統兵馬仍聽提臣張耀祖調度續因魏翥國被祿鼎明  
家人行刺帶傷祿鼎明正法隨改委楚姚總兵官官祿威甯一路  
令安龍總兵官哈元生總統兵馬以梧州副將徐成貞副之鎮雄  
一路有鎮雄營參將韓勳勇敢可用仍令哈元生調度隨據韓勳  
在莫都地方與賊血戰一晝夜殺賊數百連毀四寨賊眾奔散又

在奎鄉連戰三日敗賊八千殺賊二千餘眾此鎮雄一路之情形  
也又據總兵官官祿遊擊王耀祖等前進東川擊敗衆賊燒毀十  
三寨斬獲甚眾又遊擊何元等勦捕阿旺急羅等殺賊三百餘人  
賊哀求投降搜擒男女大小一百三十一口又遊擊紀龍等勦洗  
者家海逆衆斬殺無數此東川一路之情形也又據哈元生前進  
烏蒙擊敗賊眾數萬射死兇目黑寡暮來連踏賊營八十餘座直  
抵烏蒙恢復郡治此威甯一路之情形也見在飛催張耀祖分路  
窮搜務獲渠魁盡屠醜類所有安插調劑事宜已飭徐成貞會同  
文員一面料理其在事員弁功過各異事竣分別具題聽候部議  
諭凡犒賞此役皆從裕厚不可稍存省費小見於公用正項內酌  
量動用摺奏以聞○癸丑以徐本爲湖北布政使王紘爲江蘇按

察使

由直隸清河道遷

○甲寅諭內閣大學士馬爾賽張廷玉蔣廷錫自

簡任綸扉以來祇遵朕訓仰體朕心懋著忠勤恪恭奉職今年夏  
秋之間朕躬偶爾違和馬爾賽張廷玉蔣廷錫贊襄機務公正無  
私慎重周詳事事妥協至誠之悃方之史冊所載一心一德之風  
洵屬無愧數月之中朕躬得以靜養調攝者實賴伊等翊贊之力  
也今朕躬已經全愈宜加恩錫以褒良佐以勵臣工馬爾賽張廷  
玉蔣廷錫著各賞給一等阿達哈哈番永遠承襲仍各加二級其所  
賜世職伊等或帶於本身或給與伊子聽其自便○諭向因四川地  
畝隱匿甚多以致奸猾之徒欺其疆界不清契券無據侵陵  
攘奪告訐不休數年來內外諸臣奏請清丈者不下數十人蓋以  
田畝隱匿不但無益於國課亦且有害於民風朕再四思維始遣  
科臣高維新等前往川省會同道府州縣官料理清丈之事近聞  
該省州縣中有地少糧多之處乃歷來地方官勉強加增者此番

清丈並未覈減卽如成都華陽郫縣溫江等處皆然其他州縣或  
尚有與此相類者著巡撫憲德轉飭布政使高維新等再加確查  
若有糧賦稍重之處卽據實奏請覈減以副朕均賦恤民之至意  
○乙卯吏部題從前由部院郎官補授參領佐領者俱兼部院行  
走至部院各司官員承襲世職者其兼理之處未有定例請嗣後  
凡世職品與部院司員品相等者仍令兼理行走如有世職品大  
部院司員品小者俱令在世職上行走所遺部司員缺另行銓補  
永爲定例得旨依議嗣後世職品大不應兼理司員者果係才具  
出眾之員准該堂官具奏保留帶領引見其循分供職者照例開  
缺不得奏請兼理儻有請託徇情等弊該員引見時朕察其不稱  
保留或保留之後辦事不能妥協卽將具保之該堂官嚴加議處  
○丁巳諭內閣山東今年偶被水患特命大臣會同巡撫查賑有

房屋傾頽者賜以修葺之資並大發倉糧計口授食又准總督田文鏡之請將青菜登三府州縣存貯倉穀及通省捐監穀石照時價平糶其奉天販米商船亦准到東貿易是東省小民今歲三冬糧食有資可以無慮但恐明年青黃不接之時米價或致昂貴不可不豫爲籌畫朕思奉天連年豐稔各州縣倉儲及莊屯收貯皆極充裕且與東省一海之隔順風揚帆一日可達應趁此時北風之便將奉天近海州縣存貯米糧運送二十萬石至山東海口交與地方官俟明年二三月間照市價平糶於小民甚有裨益著正白旗漢軍都統祖秉衡刑部右侍郎王朝恩前往奉天會同將軍府尹辦理○戊午諭內閣烏蒙逆蠻不法雲貴四川見在用兵征剿閬川省之永甯建昌地方山路崎嶇所用軍糧皆須民人背負方能運送非若坦途之可以車馬馱載也舊例每糧一石運送百

里給與腳價一錢而民夫一名止能背負米糧三斗百里之程須行兩日是百姓一日之所得無幾未足供其日用之資著該撫卽行確查凡川省有山路險峻之處運送軍糧需用人力與永甯建昌相類者著將腳價速議加增一面奏聞一面卽行給發其他雲貴等省若有似此腳價不敷之處亦著該督撫確查增添仍一面奏聞該地方有司務當實力禁止侵冒等弊使力役之民質沾恩澤○以闕里文廟告成命皇五子弘晝醇郡王弘暉前往告祭○辛酉增熱河巡檢一○壬戌以馮景夏爲安徽布政使調王紘爲安徽按察使以喬世臣爲江蘇按察使由浙江杭州府遷○甲子召岳濬來京陞見以刑部右侍郎王國棟署山東巡撫吏部左侍郎劉於義協辦山東巡撫事○是月免江南壽州合肥廬州等州縣雍正七年旱災額賦有差

十一月己巳諭曰 惟至聖先師孔子道冠百王功高萬世朕景仰企慕寤寐弗諒備舉崇奉之儀用申報享之願查世襲官爵歷代俱有成規而聖廟執事之員向來未加爵秩所當廣置官僚以光祀典今欲特設聖廟執事官三品者二員四品者四員五品者六員七品者八員八品九品者各十員各按品級給與章服每逢聖廟祭祀之時虔肅冠裳駿奔趨事凡此人員著衍聖公於孔氏子孫內選擇人品端方威儀嫋雅者報部充補每年各給俸祿銀二十兩其孔氏子孫內有情願充補之人或曾經出仕而退休在籍者或身有職銜而未曾出仕者以及貢監生童等皆可入選若屆鄉試之期有情願入場者准以監生入場應試朕意如此著大學士等會同該部定議具奏尋議闕里聖廟雖有管勾典籍司樂等官分司執事而設官不過數員職銜又止七品制度

威儀未爲周備嗣後應遵照諭旨按品增設執事官員給與章服祭祀時令其陪列執事每年各給俸銀二十兩其增設人員令衍聖公將本族之致仕在籍及有職未仕並貢監生童內分別宗支遠近揀選人品端方威儀嫋雅者詳慎酌定應與品級報部具奏充補此等人員內有遇原職輪班應選者聽其就選赴任其由貢監生員充補人員有情願鄉試者令其一體鄉試若係童生准作監生編入四氏號內照額取中再嗣後遇有此項人員缺出俱令衍聖公揀選擬補報部彙奏從之○辛未增雲南都勦清江二協丹江一營千總各二把總各四黃施營千總一把總二○癸酉免貴州新墾起科暨由四川湖廣廣西改隸各地畝本年分額徵銀三萬三千三百兩有奇○甲戌浙江觀風整俗使蔡仕舢緣事降調裁觀風整俗使缺○乙亥諭戶部向來各處落地稅銀大半爲

地方官吏侵漁入己是以定例報出稅銀八百兩者准其加一級多者以此計算年來地方官員皆知守法奉公凡有稅課皆隨收隨報不敢侵隱其報出之數每倍於舊額止恐將來不無冀倖功名之人希圖侵敘以致恣意苛索擾累小民且落地稅銀非正項錢糧有一定之數者可比侵蝕隱匿者固當加以處分而爭多鬪勝者不但不當議敘亦當與以處分其如何定議並如何議敘加級處分之處著吏部戶部悉心妥議具奏尋議嗣後各省落地稅及稅契銀兩如按求需索以致盈餘之數倍於正額或將十數年以前置買產業苛索擾累者令該督題參革職上司失察徇庇者查出照例議處其於正額外實在盈餘者以八百兩爲率准加一級多者不得過三級永著爲例從之○丙子諭內閣凡漢軍人員之祖父皆本朝開國時從龍入關是以受國家之恩最爲優渥而

其中懋著功勳者不但加恩於本身且望其世世子孫居高位食厚祿綿慶澤於無窮也無如其中有一種不肖之人忘國家高厚之恩背祖宗忠義之訓自暴自棄干犯王章伊等不自念其先人而朕於執法定罪之時未嘗不念忠勳之後竟罹罪譴爲之含淚悽然不忍頒發諭旨也范時繹乃一參領耳朕念其爲名臣之後加恩用爲總兵官又特授江南總督之重任且官階加至都統尙書伊在江南玩愒廢弛無一察吏安民之善政視地方之事如膜外而鹽梟巨盜待朕訪確姓名密諭批示始行緝捕又如江浙地方潛藏匪類蠱惑人心伊不能禁約稽查以端風俗轉與私相往來及伊到京朕猶不忍令其廢棄特令料理太平峪工程適因北河總督不得其人令伊前往豈料伊正當伏汛危險忍心坐視曠職負恩至於此極此范時繹之大槩也尙崇厚之祖尙可喜於

太宗文皇帝時抒誠歸順及吳逆變亂尙之信雖干叛逆之條而  
尙可喜則始終不失臣節至其父尙之隆侍從內廷數十年小心  
勤謹深受 聖祖仁皇帝之恩尙崇廩原係散秩大臣朕望其成  
立特加任用令管理 陵寢事務因奉天積習未改特授伊爲盛  
京五部尙書令其整理訓導乃一到新任行事乖張參奏從前差  
往辦理之官達朕將官達召回詰問官達陳奏尙崇廩在任種種  
狂肆之狀復據平郡王參奏朕令大臣等將伊與同事官員一一  
傳齊質問則伊狂妄不敬背公行私之處悉皆確實此尙崇廩之  
大槩也李永陞原任河南南陽總兵官聲名不好隆科多曾經參  
奏朕查確將伊罷黜發往口外臺站效力贖罪及朕恭閱 聖祖  
仁皇帝實錄見四川原任總督李國英平寇捕賊懋著勞績詢其  
子孫則李永陞其嫡派也遂降特旨將伊調回授以參領之職後

又加恩遷擢至於都統辦理該旗事務似屬盡心職守朕以爲感奮自新大改故轍遂授爲工部尙書豈料伊一到工部之任遂作弊營私婪贓累繫延姦胥爲幕客以開招搖納賄之門審訊鑿鑿無可置辯此李永陞之大槩也此三人者均係漢軍世家之裔彼之祖父效忠宣力如此國家之酬庸賞功如此而彼之負恩孤德如此凡在廷臣莫不爲之歎息痛恨想伊祖父有知亦應含恨於九原惟是朕再四躊躇若欲按律置之於法則追念伊等前人勳勞拳効勿釋若欲寬宥其罪又恐開將來功臣子孫肆行不法之漸展轉遲疑實不能決但思伊等所犯尙不似隆科多年羹堯蔡珽不可赦宥今且施法外之仁將范時繹尙崇廉李永陞釋放令伊等洗滌肺腸遷善改惡儻能戴朕寬宥浩蕩之恩痛自愧悔將來或另有使令之處若怙惡不悛再有過犯定行正法莫希再邀

寬典也又諭范時捷係開國名臣范文程之孫乃不念國家培植之恩並不思伊祖宗積累之厚其在陝西爲官時詔媚年羹堯辱身賤行不顧爲人鄙笑朕令其來京辦理旗務則志氣昏庸委靡不振無心爲國家出力是以降爲藍翎侍衛以示懲戒繼因陵寢地方辦事需人將伊命往今范時繹獲罪罷黜范氏子孫竟無見居大員之人范時捷尚非棄材可比是以令其管理古北口提督事務觀其如何改過自新一洗從前之愧恥直隸總兵俱聽范時捷節制後不爲例○己卯諭內閣據雲貴廣西總督鄂爾泰奏報官兵恢復烏蒙情形朕心甚慰烏蒙事起倉卒賊眾獸屯鳥聚多者萬餘人少亦數千而鎮雄參將韓勳以奎鄉四百人戰敗賊眾數千連破四寨賊鑿甃臍總兵官哈元生副將徐成貞以二千餘人破賊數萬數日之內恢復烏蒙此三人者實爲功首著交部

從優議敘其在事人員參將康世顯遊擊王耀祖張起紀龍王先  
何元王友文曾長治土干總安天爵帶領官兵皆能奮勇爭先蕩  
平賊寨各著勞績鎮雄州知州徐德裕擒獲逆黨安輯良民亦屬  
可嘉凡此人員著鄂爾泰分別次第具奏到日交部從優議敘至  
隴慶侯之庶母二祿氏矢死效忠解散逆謀四川沙馬土司沙氏  
立志不移親身赴建皆係婦人能知大義應加特恩以示嘉獎沙  
氏照其應得封典加一等給與誥命二祿氏給以六品安人敕命  
並各賞銀一千兩綵段二十端其餘各土司有在軍前效力及保  
境安分者令鄂爾泰會同黃廷桂憲德查明酌量賞給至滇黔進  
勦漢土兵丁應照川省之例每名賞銀五兩其哈元生韓勳所統  
兵弁皆奮不顧身血戰數十陣首先破賊更屬勇壯著每名賞銀  
二十兩將此所賞銀交與哈元生等視其兵丁中出力之多寡酌

量分別等次賞給若一例均賞亦可參將遊擊著賞銀五百兩守備三百兩千總一百兩把總五十兩以獎忠勤之將士再另動司庫銀一萬兩賞給哈元生爲伊軍前效力及賞賚之費該部遵諭速行○改四川成都府屬松潘衛歸龍安府轄○辛巳諭內閣五子前往山東闢里專爲文廟祭祀大典並不與聞地方一事若有無知生事之人向皇五子前告狀者著地方官嚴拏治罪將此豫先通行曉諭沿途官民弁兵人等知悉○改江蘇江甯府屬溧陽縣歸鎮江府轄○壬午吏部等衙門議准甯遠大將軍岳鍾琪奏設立邊方郡縣事宜一陝省延安府屬榆林靖邊神木三廳管轄沿邊三十堡除神木同知所管東十堡已改歸州縣管轄外其榆林同知所管中十堡靖邊同知所管西十堡見今夷漢雜居必須大員彈壓請於榆林地方設知府一照磨一卽將榆林州同

靖邊經歷定邊縣丞各改爲知縣懷遠堡亦改設知縣四縣俱添  
設典史一榆林衛敎授改爲府敎授其榆林靖邊衛訓導俱改爲  
縣學訓導定邊懷遠二縣請將綏德膚施二縣之訓導改設俱歸  
新設之榆林府知府轄一榆林添設府縣足資分理原設之榆林  
靖邊同知及波羅州同威武鎮靖巡檢榆林廣育倉大使各缺均  
請裁汰惟留神木同知一以司糧捕一榆林道員轄延安綏德鄜  
州等處今榆林旣改爲府請將神木道改爲延綏道移駐綏德州  
管轄延安綏德鄜州等處其新設之榆林府並延綏道所屬之直  
隸葭州吳堡府谷神木等州縣俱改歸榆林道轄從之○移雲南  
大理府通判駐所屬趙州迷渡裁迷渡巡檢缺增白崖巡檢一裁  
開化府經歷缺增文山縣典史一○予故署戶部左侍郎常德壽  
祭葬○丁亥諭內閣各省選拔生員到京朕俱特派大臣秉公考

試分別等次進呈前有湖北應山縣生員楊可鏡一卷文理荒疏  
經部議照例革去選拔頃朕聞楊可鏡乃明臣楊漣之元孫昔順  
治四年楊漣之子楊之易爲江南松江府同知遭提督吳勝兆之  
叛捐軀殉難忠節凜然蒙世祖章皇帝之恩優加贈卹此卽楊  
可鏡之曾祖也朕思楊漣父子兩世忠義其後嗣子孫若稍能自  
立品行無虧雖文藝不工亦當格外造就楊可鏡准作選拔赴國  
子監肄業仍著禮部帶領引見○晉封喀爾喀扎薩克郡王丹津  
多爾濟爲扎薩克和碩親王○戊子諭內閣朕卽位之初清查戶  
部錢糧始知厯年以來虧空竟至二百五十餘萬兩之多是時怡  
賢親王管理部務奏稱此項虧空厯年已久若一一根究責令賠  
補則獲罪之人甚眾懇請寬免查究嗣後以本部餘平銀兩陸續  
代爲完補數年以來該部既有補帑之事是以各省解銀交庫之

時平銀未免稍重但從前解京銀兩到部交納時雜費繁多又有  
暗中包攬官吏勒索種種情弊此中外所共知者自怡賢親王管  
理三庫以來弊絕風清各色浮費悉行禁革雖餘平銀兩畧覺加  
添而較之從前雜費則減省已多且怡賢親王之意原欲俟虧空  
彌補全完之後仍將平銀裁減此亦王屢次諫奏於朕前者今庫  
中虧空之項俱已補足著將辛亥年春撥解部銀兩照從前餘平  
之數減去一半該部卽行文各省巡撫布政使知之此項銀兩大  
約出自耗羨項下嗣後著留於本省以備地方公事之用若司庫  
官員有額外多索者著管理三庫之王大臣查參若外省官員因  
此次恩旨將解部之項或有扣剋短少等弊亦著王大臣指參議  
處○己丑賜齊大勇等一百十八人武進士及第出身有差○復  
設四川川北道一駐保甯府○庚寅諭內閣凡朕降旨特交事件

該衙門有卽行辦理者亦有遲久尙未辦理者總因無專司稽察  
督催之人是以遲速不齊間有耽延嗣後著於滿漢文武大臣內  
派出數人管理欽命上諭事件專任稽查督催之責其滿司官卽  
用議政處辦事之員漢司官著派出之大臣等揀選委用○裁江  
南臨淮縣濠梁驛滁州滁陽驛江浦縣江淮驛六合縣棠邑驛丹  
徒縣京口驛江都縣廣陵驛儀徵縣水驛高郵州孟城驛寶應縣  
安平驛山陽縣淮陰驛清河縣清口驛宿遷縣鍾吾驛驛丞各一  
其驛務歸各州縣管理復設潛山縣青口驛太湖縣小池驛驛丞  
各一增南陵縣公館驛桃源縣古城驛驛丞各一○辛卯復設廣  
東鹽運使衙門知事一駐紮潮州府○封巴林輔國公桑里達爲  
都王○癸巳解孫國璽任以孫蘭芬署山東布政使由登萊青道署○是  
月免廣西天鎮縣旱災額賦有差

十二月丁酉傅爾丹自京回北路軍營○己亥以署安徽布政使  
劉柟爲太常寺卿○工部等衙門遵旨議奏直隸河工關繫重大  
請設立河道水利總督一員駐紮天津令四道廳員及印河各官  
受其節制一切事務俱照河東總河例行其營田事務仍歸直隸  
總督管理從之○辛丑敕封直隸滹沱河神爲長源永濟滹沱河  
神○壬寅岳鍾琪自京回西路軍營○予故戶部侍郎三庫事務  
噶爾泰祭葬○甲辰諭戶部今年江南河東等省間有被水州縣  
已降旨發粟蠲租並令該督撫加意撫恤但至明歲春間青黃不  
接之時恐不無借資鄰省買米減糶之事湖南湖北二省向來積  
穀甚多正在豫籌出陳易新之法而今年又復豐收穀價太減恐  
民間出難維艱朕特思酌盈剏虛之道著將從前商捐及耗羨銀  
兩存貯各省藩庫者動支五萬兩遴選賢員分往所屬豐收價平

之處糧買新穀暫行收貯俟鄰省需米平糶卽令委員來楚照楚  
省原買價值先儘倉貯之穀交買運回以濟民食仍將新穀補倉  
價銀還項如此則鄰省無貴糶之虞楚省得出陳之益事屬兩便  
儻鄰省可以不用則仍留楚省於青黃不接之時照價平糶於民  
亦屬有濟著該督撫遵諭料理並移會鄰省知之○丙午以和碩  
端柔公主下嫁齊墨特多爾濟授爲和碩額駙○辛亥調葛森爲  
貴州布政使以常安爲雲南布政使馮光裕爲雲南按察使由鹽  
選道○癸丑命大學士朱軾兼管兵部尚書○以吏部左侍郎劉於  
義爲直隸河道水利總督內閣學士徐湛恩協辦河道事○刑部  
等衙門會議呂留良身列本朝子衿妄附前代儀賓之裔追思舊  
國詆毀朝章造作惡言妄行記撰猖狂悖亂罪惡滔天甚至敢將  
聖祖仁皇帝誣譖指斥悖逆已極臣等莫不切齒痛心允宜按

律治罪顯加誅滅以扶人紀以絕亂源呂留良應剴屍梟示財產入官伊子呂葆中曾叨仕籍世惡相濟前此一念和尚謀叛案內連及呂葆中逆蹟彰著亦應剴屍梟示呂毅中應援斬立決伊子孫並兄弟伯叔兄弟之子及女妻妾姊妹子之子妻妾應行文該督查明按律完結並行知各省府州縣將大逆呂留良所著文集詩集日記及他書已經刊刷及鈔錄者於文到日出示徧諭勒限一年盡行焚毀得旨呂留良懷悖逆不臣之心假託先儒糟粕餘論欺世盜名以致人心陷溺爲其迷惑已久愚昧之徒稱爲夫子幾謂其駕乎程朱之上甚至奉祀書院以尊崇之今其逆謀穢行無不敗露天下焉有喪滅倫常猶得託名於理學之林而著作尙有可取者乎今內外臣工等合詞陳奏朕思呂留良之罪從前諭旨甚明在天理國法萬無可寬然天下至廣讀書之人至多或者

千萬人中尚有其人謂呂留良之罪不至於極典者朕慎重刑罰  
誅奸鋗叛必合乎人心之大公以昭與眾棄之之義至其所著書  
集臣工等奏請焚毀復思呂留良不過盜襲古人之緒餘以肆其  
狂誕空浮之論有識見者固不待言卽當日被其愚惑者今亦自  
然窺其底裏而嗤笑之也況其人品心術若此其言更何可取今  
若焚滅其蹟假使毀棄不盡則事屬空文儻毀棄盡絕則將來未  
見其書者轉疑伊之著述實能闡發聖賢精蘊而惜其不可復得  
也卽呂留良書籍中有大逆不道之語伏思我 聖祖仁皇帝聖  
德神功際天蟠地如日月之照臨宇宙萬古爲昭豈呂留良所能  
虧蔽於萬一乎著將廷臣所議行文直省學政徧行詢問各學生  
監等應否照議將呂留良呂葆中劉屍梟示伊子呂毅中斬決其  
所著文集詩集日記及他書已經刊刻刷印暨鈔錄者盡行燔毀

之處著秉公據實作速取具該生監等結狀具奏其有獨抒己見令其自行具呈該學政一併具奏不可阻撓隱匿俟具奏到日再降諭旨○增甘肅張掖縣驛丞一駐繁沙河兼管沙河撫夷二驛高臺縣驛丞一駐繁鹽池兼管鹽池雙井二驛改涼州平城驛兼管之通遠驛務歸平番縣管理○乙卯護理甯遠大將軍紀成斌奏準噶爾賊人乘我西路軍營不備傾其醜類二萬餘眾犯闕舍圖卡倫盜趕駝馬總兵官樊廷率副將治大雄等領兵二千轉戰七晝夜救出兩處卡倫官兵會合總兵官張元佐等擊殺賊兵不計其數將駝馬牲畜悉行奪得旨所奏逆夷盜趕駝馬情形大學士等可傳諭靖邊大將軍傅爾丹參贊陳泰蘇圖令其行文副將軍巴賽等駐牧和博克薩里之逆夷或遣賊眾至北路卡倫偷盜駝馬亦未可定宜小心防範不可疏忽亦不得聞信矜張務宜

鎮靜嚴密萬全無弊傳爾丹等亦速馳赴軍營斟酌妥辦○四川  
巡撫憲德奏川省回民感激天恩集眾誦經恭祝萬壽得旨  
數年以來凡內外臣民等感戴朕恩有欲建立碑亭及開設經壇  
以申頌祝者皆已嚴行禁止並令大臣官員殫竭誠意屏絕虛文  
曉諭所屬士庶兵丁等一體遵奉屢降諭旨甚明川省回民集眾  
誦經該撫不行禁止轉爲代題甚屬不合著嚴飭行並曉諭眾回  
民知之○丁巳諭戶部今歲山東被水之州縣朕心軫念殷切已  
令地方有司加意撫綏又特遣大臣等按戶查賑並給以修葺室  
廬之資其成災州縣之地丁錢糧及漕糧並行豁免欲使閭閻厚  
沾恩澤咸登衽席也頃又思該省既有被災之州縣則本地所產  
之米較少於平時其不成災州縣應有交官漕糧若此時仍照舊  
徵收則米價稍昂未免輸將竭蹙但查漕糧向無豁免之例今年

之暫免徵收者出於朕之特恩至不成災之州縣尤難越例蠲除  
今再四思維著將東省不成災之州縣今歲應徵之漕糧停其徵  
收俾民間多留穀石則民間自覺寬裕俟明年收成之後令百姓  
照數交官此項不必運送京師卽存貯本省補完今歲散賑之倉  
穀如此庶於地方大有裨益著卽遵諭行○諭朕查陝西臨洮府  
屬之保安堡番民歸化多年按照田畝起科共額徵糧八百一十  
五石五斗因該堡向日止設番兵一百二十名卽以應納之糧抵  
作應支之兵食伊等知種地而不完賦知充伍而不領糧相沿已  
久嗣因番兵差操未便於是另募內地民兵二百名以備防汛卽  
將額徵之番糧充作兵丁之月餉其舊設番兵悉行開除惟是保  
安一堡與新附上下龍布阿步喇等番族界址相接新附番族俱  
按戶科糧每戶止納青稞一斗而保安則按田起科以不及千戶

之番民歲徵糧八百餘石未免多寡懸殊非朕一視同仁之意著將保安堡番糧亦照新附番民之例每戶納糧一斗徵收在倉留爲積貯其見募之兵二百名所需糧料俱照例給與折色以示朕加恩番民之至意○擢喀爾吉善爲兵部額外侍郎由郎中遷○己未四川巡撫憲德奏建昌鎮甯越營所屬番民望里五呷等二百三十二戶內附○壬戌諭內閣 皇五子致祭闕里 文廟典禮告成回京奏稱恭謁 孔林周視規制見享堂墻垣間有年久傾圮之處朕尊崇 先師夙夜罔斁今廟貌已經鼎新林圃允宜修葺著欽天監選員前往會同衍聖公孔傳鐸相度方位宜於何時營治詳慎定議屆期朕命大臣前赴曲阜與衍聖公孔傳鐸協同敬謹修理務令崇閑堅固光垂永久以昭朕尊禮 先師之至意○諭大學士等準噶爾乘我不意傾其賊眾盜趕馬駝狡猾兇惡罪

無可赦但西路所存駝馬不無疲乏足從前所議直搗伊犁之計  
尙非萬全之道朕意欲於西路巴爾庫爾北路之卡倫外各築一  
城以重兵駐紮時出遊兵以掩擊其眾擒擄其人畜賊兵必撤其  
遊牧之所遠行藏退我當更進數百里擇地築城開墾屯種以資  
軍食駝馬牛羊無事牧放有事則盡收入城賊眾既無所獲我軍  
一出可以襲取其輜重且賊必不敢踰我軍駐紮之城而東矣著  
岳鍾琪詳悉定議北路傅爾丹處亦詳細密商之○甲子諭大學  
士等自有軍務以來喀爾喀等甚爲出力來歲大兵進剿之時所  
有派在卡倫豫備之三千名喀爾喀兵丁不必前往俾其得以照  
管牲牧著派出內扎薩克之兵二千名前往卡倫駐紮令科爾沁  
郡王羅卜藏喇錫翁牛特貝子羅卜藏敖漢公羅卜藏總統管理  
此所派出之官兵照例加與恩賞○是月免直隸蔚州蔚縣水災

額賦有差○是歲安南國來貢○人丁戶口二千五百四十八萬四百九十八又永不加賦滋生人丁八十五萬一千九百五十九田地山蕩畦地八百七十八萬一千七百六十頃十七畝有奇徵銀二千九百七十八萬六千八百六兩有奇米豆麥四百七十一萬八千六百九十五石有奇草四百九十九萬六千七東茶三十二萬六千七百十九引行鹽五百一十四萬九千一百十五引徵課銀三百八十三萬八千四百十七兩有奇鑄錢七萬五千七百八十六萬五千有奇